

KELUARAN KE-11

e-BULETIN

JSKM

EDISI APRIL 2024

USAH GUSAR MENJADI PEMIMPIN

*"Setiap dari kita ada ciri-ciri
kepimpinan sama ada ianya
terserlah atau tersembunyi."*

TS. JAMAL OTHMAN

FALSAFAH
HUKUM
JINAYAH
ISLAM

TIPS MEMBANTU
ANAK MENGHAFAZ
AL-QURAN DARI
KECIL

KISAH DUKA BAYI
DI PALESTIN

FASA DI HUJUNG
NYAWA



e-ISSN-2637-0077



perkongasian

MONOLOG SEORANG AKU



Noor Aina Abdul Razak

Sudah hampir tiga tahun aku mengenalinya, sejak aku dipindahkan ke pejabat baru. Sejak perkenalan hari pertama, antara aku dan dia, kami saling bertegur sapa. Aku berasa senang sekali bila dapat berbicara dengannya, walaupun jarang bertemu kerana kami berlainan jabatan. Tetapi, kebelakangan ini aku dapat merasakan layanannya terhadapku berlainan sekali sehinggalah..

“Keluar nak?” dia bertanya padaku.

“Tak nak!” jawabanku yang ringkas itu menghampakannya.

Namun, dia tidak berputus asa untuk terus mengajakku keluar. Soalan yang sama sering diajukan padaku.

“Keluar nak? Hujung minggu ni. Aku dah lama nak belanja kau makan.” Untuk kesekian kalinya dia terus mengajakku.

“Kalau setakat nak belanja makan, di sini pun boleh,” kataku serba salah. “Tapi...nantilah, saya fikirkan dulu.”

Itulah jawabanku. Jawapan yang sama setiap kali dia bertanyakan soalan itu. Pernah, dia menetapkan sendiri tarikh untuk berjumpa denganku. Malang baginya kerana kusangkakan ajakan itu sekadar satu gurauan. Aku sama sekali tidak menyangka dia betul-betul bermaksud untuk berjumpa denganku pada hari tersebut.

Beberapa minggu berselang. Dan, sekali lagi dia cuba mengajakku keluar. Akhirnya aku bersetuju memberi kata putus.

“Saya boleh keluar, tapi dengan syarat. Kita pergi berasingan. Awak tunggu saya di sana, boleh?” Jauh di dalam hatiku berkata, “Betul ke apa yang aku katakan ini?” Walaupun aku menerima pelawaannya, aku bimbang jika telahanku benar belaka.

“Baik! Aku tunggu kau di sana jam sebelas pagi, di hadapan bank, ok!” Begitu senang sekali dia bersetuju dengan syaratku.

Malam itu aku asyik memikirkan janjiku untuk bertemu pada minggu hadapan. Bermacam-macam soalan yang timbul di dalam fikiranku. Risau aku dibuatnya.

“Apa yang dia mahukan dariku? Kalau setakat nak belanja, apa salahnya makan di sini saja? Apa yang harus dimalukan?”

Hari itu, hatiku berdebar-debar. Setiap detik mataku asyik memandang pusingan jarum jam. Bila jam menunjukkan pukul sepuluh pagi, aku sudah keluar dari rumah sewaku. Peganganku, biar aku yang menunggu orang, jangan orang menunggu aku. Ketika menaiki bas, aku rasakan perjalanannya lambat sekali. Padahal aku tahu, masa untuk sampai hanya 30 minit sahaja. Ketika bas berhenti di tempat yang dituju, aku tidak terus ke tempat yang dijanjikan kerana belum pukul sebelas. Sebaliknya aku cuba berjalan-jalan untuk menenangkan perasaanku. Tepat jam sebelas, bila aku ke sana, kulihat dia sudah menunggu.

“Assalamualaikum,” spanya.

“Waalaiikumussalam. Dah lama tunggu?” dalam keadaanku yang belum bersedia aku cuba berlagak seperti biasa. “Kita nak ke mana ni? Nak terus makan ke?” Aku cuba bertanya lagi.

“Nantilah dulu. Awal lagi ni. Kita masuk ke dalam pasaraya ni dulu. Aku nak membeli barang sedikit,” katanya.

Lalu, kami bergerak masuk ke dalam pasaraya berdekatan. Aku meninggalkannya di bahagian lelaki, dan terus menuju ke bahagian pakaian wanita. Sebenarnya, aku tidak bertujuan untuk membeli, sekadar untuk menenangkan hatiku yang masih berdebar ini. Ketika aku kembali ke bahagian lelaki, dia masih belum selesai memilih lagi.

“Hai! Tak sudah lagi ke? Apa yang tak kena dengan yang itu?” Aku cuba bersuara.

“Yang ini tak sesuai la. Aku nak cari yang lebih selesa,” balasnya.

“Suka hati awaklah. Saya tunggu di bawah, ok.” Beberapa minit kemudian kulihat dia turun dengan menjinjing sebuah beg plastik.

“Dah dapat?” Tanyaku ringkas.

“Dah. Nak ke mana lepas ni?”

“Entah. Manalah saya tahu. Orang yang ajak, saya ikut saja. Awak yang nak belanja.”

“Kalau begitu, jom! Kita ke KFC,” ajaknya sambil tersenyum.

“Hai, termenung ke?” Secara tiba-tiba dia menegur, sambil meletakkan makanan yang dipesan. Lamunanku terputus di situ.

“Tak. Saya tengah memerhatikan orang yang lalu lalang tu,” aku cuba berdalih.

“Makanlah. Apa yang kau tunggu lagi?” Pelawanya.

“Banyaknya awak pesan. Habis ke ni?”

“Tak habis tak apa. Aku yang bayar, kau makan saja.”

Sambil makan aku terus memikirkan tentang soalan-soalan yang telah aku rakamkan dalam kotak fikiranku ini. Patutkah aku bertanya padanya tentang hal itu?

“Saya nak tanya beberapa soalan boleh tak?” Aku memberanikan diri untuk bertanya.

“Banyak mana kau nak tanya pun tak apa,” dia memberikan aku keyakinan untuk meneruskan niatku.

“Saya dengar awak belum kahwin, betul ke?”

“Siapa yang beritahu kau? Ini tentu ada yang buat cerita. Memang benar aku belum kahwin. Mengapa? Kau tak percaya ye?” Dia pula yang menyoalku. “Kalau aku dah kahwin, aku tak ajak kau keluar hari ni,” sambungnya sebelum sempat aku menjawab.

“Bukan itu maksud saya. Saya lihat awak macam orang yang telah berkeluarga. Sebab tu saya tanya. Umur awak berapa sekarang?” Secara ‘direct’ aku ajukan soalan kedua untuknya.

“27 tahun. Mengapa kau tanya?”

“Saja nak tau.” Aku menjawab secara selamba.

“Kenapa awak ajak saya keluar. Orang lain kan ramai lagi? Mengapa saya yang dicari?” Aku cuba memecahkan keraguan yang bermain di fikiranku.

“Kau nak tahu sangat-sangatlah ya? Hmm. Aku rasa senang bila dapat berbual dengan kau. Banyak cerita yang dapat kita kongsi bersama. Lagipun engkau seorang pekerja dan pelajar part time. Cara pemikiran kau tak sama dengan mereka yang aku kenali sebelum ini. Selain itu, aku nak belanja kau! Itu saja,” katanya itu diakhiri dengan ketawa kecil. Dari awal kuperhatikan, dia memang seorang yang senang ketawa. Hati riang mungkin.

“Kalau begitu tak apalah,” sahutku sambil tersenyum.

Sambil berbual kami menghabiskan makanan yang tinggal sedikit lagi. “Habis juga ‘food’ ni,” kata hatiku.

Kemudian kami terus beredar ke deretan kedai pakaian yang berdekatan. Aku memang tidak pernah ke situ. Jadi, sekali lagi kubiarkan dia berjalan di hadapanku. Sambil itu, aku membelek-belek t-shirt yang digantung, tetapi tiada satu pun yang menarik perhatianku.

Ya, Allah! Jantungku berdegup kencang. Benarkah apa yang kulihat ini? Aku bertembung dengan rakan-rakan sekerjaku.

“Macamana ni? Matilah aku kali ni,” hatiku bersuara. “Kalaulah mereka nampak.”

Aku berlagak seperti tiada apa-apa yang berlaku ketika salah seorang daripada mereka menegurku. Mereka tak lama di situ. Lega hatiku. Apabila aku mendekatinya semula, dia memberitahuku yang dia telah menyedari akan hal tu, sebab itu dia berada jauh dari aku. Patutlah semasa mereka menegurku tadi aku lihat dia tiada di situ.

Selesai merayau melihat pakaian-pakaian yang dijual, kami menuju ke panggung wayang berhampiran. Nak tengok Adi Putra katanya. Di situ, sekali lagi aku bertembung dengan rakan-rakanku yang tadi. Jadi, untuk mengelakkan mereka menyedari kehadirannya, aku pun masuk seorang diri ke dalam panggung. Kira-kira lima minit lepas itu barulah dia masuk dan duduk di sebelahku. Cerita Mat Kilau yang kami tonton walaupun agak membosankan aku, tetapi tetap menghiburkan. Aku lihat dia begitu khusyuk.

“Lantak kaulah, asalkan itu mengembirakan,” aku berkata pada diriku sendiri.

Ketika menonton, kami tidak banyak bersuara. Masing-masing lebih menumpukan perhatian pada cerita yang ditayangkan. Tamat sahaja cerita, aku biarkan dia keluar dahulu dan menunggu aku di luar. Aku mahu mengelakkan diri dari bertembung dengan mereka lagi. Kemudian kami menuju ke surau untuk solat zohor. Selesai bersolat, aku lihat dia telah sedia menunggu aku.

“Nak ke mana lagi? Balik?” Soalnya.

“Entah le. Nak balik pun awal lagi,” jawabku acuh tak acuh dengan pertanyaannya tadi.

“Kalau begitu, kita lepak kat situ sekejap,” dia sendiri memberikan jawapannya.

Di satu sudut kedai makan, kami meneruskan perbualan. Ketika itu, jam sudah menunjukkan pukul 5.30 petang. Nampaknya aku perlu balik segera sebelum hari gelap. Dalam perjalanan ke stesen bas, aku mengambil keputusan untuk terus pulang ke rumah kerana aku bimbang jika aku melewatkan waktu, susah pula untuk mendapatkan bas nanti. Setelah mengucapkan terima kasih, aku pun menaiki bas yang sedia ada di situ.

Di dalam perut bas, aku tersenyum sendirian bila mengingati semula pertemuan hari ini. Biarlah kalau penumpang lain memandang ‘semacam’. Padaku dia seorang yang baik hati, tetapi aku menganggapnya biasa sahaja. Tidak terlintas di hati kecilku ketika itu untuk beranggapan lebih daripada seorang kawan.

Pertemuan hari itu aku biarkan berlalu begitu sahaja. Tentu dia telah berpuas hati kerana dapat membelanjaku tempoh hari. Beberapa hari selepas itu dia ada juga bertugas di sini, tetapi aku buat tak kisah saja. Bagiku, antara aku dan dia hanya sebagai kawan biasa walaupun sesekali aku mengingatnya.

Suatu hari, kerani di pejabat memberitahuku yang dia telah dua kali menelefon dan bertanyakan hal aku. Aku tahu dia memang baik dengan kakak kerani tu. Tapi, entah betul atau tidak hal ini aku tidak pasti.

Aku tertanya-tanya sendirian. “Untuk apa dia mencari aku? Masih adakah perkara yang belum selesai? Betul ke apa yang kakak ni cakap?” Bermacam-macam soalan bermain di fikiranku.

Beberapa hari lagi aku akan memulakan cuti untuk menyambut Hari Raya Aidilfitri bersama-sama keluargaku di kampung. Dan hari ini juga kekusutan yang bermain di fikiranku terjawab walaupun kurasakan tidak sepenuhnya. Kebetulan pada hari ini dia ada tugas di jabatan aku. Jadi, aku sengaja mengambil kesempatan untuk berjumpa dan berbual dengannya.

“Nak ke mana?” Dia menegurku.

“Ambil angin luar,” ujarku.

“Datang sini sekejap,” seperti seorang bos dia memanggilku. Aku lihat dia mengeluarkan sesuatu dari dalam begnya.

“Kad! Untuk siapa?” Aku berbisik pada diriku.

“Ini untuk kau.” Soalanku terjawab dengan sendiri.

Oh! Kad raya untuk aku rupanya. Selepas mengucapkan terima kasih, aku terus berlalu dari situ. Sememangnya aku terkejut. Itulah kad raya terbesar yang pernahku terima seumur hidupku. Apa mimpinya tiba-tiba memberikan aku kad tersebut? Zaman sekarang adalah sesuatu yang rare bila menerima kad hari raya.

Tiba di rumah selepas kerja, aku terus menuju ke meja studyku. Tidak sabar rasanya untuk melihat isi kandungan kad itu. Ya, Allah! Tabahkanlah hati hambamu ini. Apakah aku hanya bermimpi atau ia sekadar satu gurauan? Dadaku berdegup kencang. “Khas Untukmu Sayangku” tercetak dengan jelas sekali. Tulisannya hanya ucapan terima kasih kerana sudi keluar dengannya tempoh hari. Namun begitu, aku tertarik untuk membaca bait-bait puisi yang sedia tercetak pada kad itu.

“Sepanjang percintaan ini
Cabaran dan dugaan kutempuhi
Cinta setia yang kukari
Telah pun kutemui
 Kumencurah kasih bertahun
 Sesegar...sesuci titisan embun
 Padamu kuberi cinta sejati
 Tanda kesetiaan yang abadi
Selagi hayat masih ada
Aku akan tetap setia
Ku yakin rahmat buat kita
Menunggu di hari muka
 Sempena Aidilfitri
 yang mulia ini...
 Terimalah secebis Anugerah Cinta
 yang ikhlas dariku
Selamat Hari Raya
Maaf Zahir Batin”

Kuulang membaca baris-baris tersebut. Tergamam. Bersama-sama kad itu juga disertakan terjemahan ayat dan hadis untuk renunganku. Terima kasih. Tetapi, kad itu dan kata-kata yang tertera. Ah! Aku gundah jadinya.

Hari demi hari berlalu, aku berterusan memikirkan tentang hal itu. Kata-kata itu terus bermain di fikiranku. Namun begitu, seperti kad-kad lain yang aku terima, aku sediakan juga satu kad untuknya sebagai balasan. Aku terfikir untuk bertanya padanya secara terus terang. Aku mesti memberanikan diri untuk mendapatkan penjelasan, biar pun tindakan aku nanti dianggap tidak wajar.

“Free tak petang ni?” Aku menelefon.

“Hei! Mana kau dapat nombor aku ni?” Nada suaranya seperti terkejut.

“Dari Kak Tim. Free tak petang ni?” Aku mengulang soalanku tadi.

“Ada apa?”

“Boleh tak datang sini sekejap? Saya nak minta tolong jagakan pokok yang saya bela ni. Disebabkan saya cuti raya seminggu, jadi tak ada sesiapa yang boleh tolong siramkan. Boleh tak?” pintaku.

“Kalau begitu, Insya-Allah, lepas asar nanti aku datang ambil,” jawabannya melegakanku.

Tepat seperti yang dijanjikan, dia tiba dengan kereta merahnya.

Aku terus menyerahkan pokok yang kukatakan tadi. Kad balasan untuknya juga kubawa tetapi aku tidak mahu tergesa-gesa memberi padanya. Aku memerlukan penjelasan darinya. Aku nekad.

“Nak tanya sikit boleh tak?” Ku ajukan soalan.

“Banyak pun tak apa,” ujarnya.

“Kenapa berikan saya kad tersebut? Kata-kata dalam kad tu...” Lidahku kelu untuk terus berkata-kata.

“Ala. Bukannya apa. Mengapa nak risau? Anggap biasa sudah.” Bersahaja nada jawabannya.

“Macamana nak anggap biasa? Lain macam aje bunyinya.”

Aku mencuba lagi untuk mendapatkan kepastian. Jawapan yang kuterima masih sama. Lantas aku mendiamkan diri sahaja. Melihatkan aku mendiamkan diri, dia mengajakku bersiar-siar melihat bandar selepas pulang kerja. Aku cuba menolak pelawaannya walaupun aku menyedari hanya kebosanan yang ada jika aku terus berada di situ. Puas dipujuknya sehingga aku bersetuju. Tetapi hanya untuk sekejap saja sebab aku perlu ke stesen bas selepas magrib.

Kereta yang dipandu terus menuju ke pusat bandar. Leka aku seketika. Sambil berbual, aku menumpukan perhatian ke luar. Kekadang, apa yang dicakapkannya kurang jelas pada pendengaran. Salah diriku juga. Aku sendiri hampir-hampir membongkar semula kisah silam. Namun, serba sedikit dia tahu juga kisahku.

“Jadinya, kau ‘single’lah ya? Boleh la aku masuk!”

Berdegup jantungku mendengar kenyataannya. Aku cuba buat-buat tidak faham.

“Masuk apa?”

“Ya la. Masuk jadi ‘partner’ kau,” katanya.

Apa! Sekali lagi kurasakan jantungku seperti tidak berdenyut lagi. Terdiam aku seketika. Namun, aku masih mampu tersenyum. “Ah! Dia hanya bergurau,” hatiku berbisik. Namun, aku terangkan juga padanya bahawa aku mahu sendirian buat masa sekarang. Aku tidak mahu luka lama berdarah kembali. Kekecewaan mengajarku untuk lebih berhati-hati. Perbualan kami terhenti di situ. Leka bercerita. Sedar-sedar sudah tiba ke ofis semula.

“Jumpa lagi,” katanya sebelum meninggalkan aku.

“Insya-Allah. Oh! Ya! Ini kad untuk awak. Terima kasih kerana menghilangkan rasa bosan saya,” ujarku.

Semasa dalam percutianku sempena menyambut Aidilfitri, sesekali ingatan aku jatuh juga padanya. Rindukah aku? Ah! Perasaan! Benarlah seperti madah yang pernah aku baca dahulu. Perasaan bagai air laut yang bergelombang, sekejap mendatang, sekejap menghilang.

Tanpaku duga, suatu hari aku menerima panggilan telefon darinya. Nampaknya dia benar-benar berusaha mendapatkan nombor telefonku, dengan caranya yang tersendiri. Tujuannya hanya untuk memberitahuku yang dia tidak dapat datang ke rumahku pada hari raya nanti. Ketika itu baru aku teringat pada jemputanku tempoh hari. Padan muka aku. Serius pula dia pada ajak-ajak ayam aku.

Dua hari selepas itu aku mendapat panggilan lewat malam. Dalam keadaan mamai aku cuba juga berbual dengannya. Sedar-sedar jam sudah menunjukkan pukul satu pagi. Hampir sejam lebih kami berbual. Ah! Dia begitu bijak melayan perbualan. Waktu yang lama kurasakan singkat sekali. Tetapi aku tidak dapat menahan rasa mengantukku lalu meminta diri untuk tidur. Dan, malam itu lenaku nyenyak sekali.

Bersambung.....